



Ե Ր Կ Շ Ա Բ Ա Թ Ա Թ Ե Ր Թ

ՀՀ Դաշնակցության Արցախի Կենտրոնական Կոմիտեի պաշտոնաթերթ

Մենք համացանցում

www.aparaj.am

Քաղաքական նախաձեռնություններ շրջափակման պայմաններում

Շարունակվող շրջափակումը անկյունաքարային փոփոխությունների է ենթարկել Արցախում բնակվող յուրաքանչյուր անհատի առօրյա կյանքը: Այդ փոփոխությունները անհատական դաշտից առավել նկատելի են Արցախի քաղաքական, տնտեսական, անվտանգային և կենսապահպանման համակարգերում: Բնական է, որ լուծելի խնդիրների առաջին շարքում պարենի, առաջին անհրաժեշտության ապրանքների սակավության վերացման կամ հավասարաչափ բաշխման համակարգի ստեղծումն է:

Պետք է անկեղծորեն նշել, որ այդ ասպարեզում օպերատիվ շտաբը կատարել է արդյունավետ աշխատանք, և այսօրվա դրությամբ այդ խնդիրը կարելի է լուծված համարել: Թվում է, թե կենցաղային հարցերի լուծումը կարող է բավարար լինել ավելիին դիմակայելու համար, և խնդիրները կարելի է փարատված համարել: Սակայն իրականությունն այլ է: Նման պայմաններում քաղաքական ճիշտ մոտեցումների կիրառումը հնարավորություն կտա արդյունավետ լուծումներ գտնել և լավագույն տարբերակներ ի հայտ բերել:

Քաղաքական կողմնորոշումների և հաշվարկների դրական ազդեցությունը համատարած է և շոշափելի կլինի յուրաքանչյուր ոլորտում՝ թե՛ արտաքին հարաբերությունների և թե՛ ներքին կառավարման համակարգերում:

Քաղաքական ուժերի ներքին համերաշխությունը, համախմբվածությունը, մեկ թիրախի ուղղությամբ գործունեության կենտրոնացումը էական ազդեցություն ունեն ներքին կառավարման և արտաքին քաղաքական նախաձեռնությունների արդյունավետությունն ապահովելու համար: Մյուս կողմից, ճգնաժամային պայմաններում անհրաժեշտ վերադասավորումները պատճառ կդառնան, որպեսզի նվազեցվի հնարավոր լարվածության օջախների առկայությունը:

Ելնելով վերը նշված իրողություններից, Արցախի քաղաքական դաշտում այժմեական են մնում մի շարք նախաձեռնությունների և միջոցների կիրառումը:

Այդ լուծումներից առաջինը դեռևս պատերազմից անմիջապես հետո բոլորի մոտ առաջացած մայր օրենքի՝ Սահմանադրության փոփոխության հարցն է: Սահմանադրության բարեփոխումների միջոցով առիթ կլինի մեկ անգամ ևս ամբողջացնել 30 տարիների ընթացքում պետականաշինության գործընթացում գրանցված հաջողությունները և այն համապատասխանեցնել օրվա պահանջներին:

Շրջափակման հետևանքներից մեկը նաև Արցախի քաղաքական մեկուսացումն է: Դա ևս Ադրբեջանի նպատակներից մեկն է, որի միջոցով փորձում է բարոյահոգեբանական ճնշման ենթարկել Արցախի ազգաբնակչությանը: Ներկա դրությամբ Ադրբեջանին դա չի հաջողվում լիարժեք իրականացնել, քանի որ Սփյուռքի զանազան օջախներում առկա է ակտիվություն և լոբբիստական աշխատանքներ: Սակայն այդ բոլորը չի կարելի բավարար համարել: Անհրաժեշտ է Արցախի ԱԳՆ-ին կից ձևավորել աշխատանքային խումբ արտաքին քաղաքական նախաձեռնությունների մշակման և տեղեկատվական, քարոզչական աշխատանքները համակարգելու համար:

Եվ վերջապես, այս իրավիճակին համահունչ պետական կառավարման համակարգի ձևավորման անհրաժեշտությունն օրախնդիր է: Ներկա դրությամբ աշխատող օպերատիվ կառավարման շտաբը կարողանում է ինչ-որ չափով լուծել կենցաղային, առօրյա հարցեր, սակայն, ինչպես ասվեց, այլ մակարդակի քաղաքական հարցերի լուծումը ևս անժամանկելի է: Իսկ այդ քաղաքական մարմինը պետք է ի մի բերվի քաղաքական համախմբությամբ և օրենքի թելադրանքով:



HRAYR BADALYAN

Ի գորակցություն շրջափակված Արցախի

«Արցախը մե՛րն է», «Մենք ենք Արցախը», «Կեցցե՛ արցախահայությունը» և նման կարգախոսներով լիբանանահայության բոլոր շերտերը հունվարի 25-ին Լիբանանի Պուրճ Յամուն քաղաքում իրենց գորակցությունը հայտնեցին 45 օրեր ի վեր շրջափակման մեջ գտնվող, կենցաղային, մարդկային, առողջական, ջեռուցման, սննդի, դեղորայքի և բազում դժվարությունների դեմ հանդիման կանգնած, սակայն պայքարող և իր հողին կառչած արցախահայությանը:

Սոցիալ-դեմոկրատ հնչակյան կուսակցության, Հայ Յեղափոխական Դաշնակցության և Ռամկավար Ազատական կուսակցության կողմից կազմակերպված, Ադրբեջանի կողմից ծավալված հայաթափման արշավի դեմ և Արցախի գորակցող հավաքին լիբանանահայերն իրենց բարձրացրած պահանջատիրական պաստառներով, արտասանած ազգային շնչով բաբախող կարգախոսներով հաստատեցին, որ Արցախի հայկականությունն անսակարկելի է, արցախահայությունը Հայաստանին ու աշխարհին կապող միակ ճանապարհի՝ Բերձորի միջանցքի բացումը հրամայական է: Միջազգային ընտանիքը պետք է քայլեր ձեռնարկի Արցախում էթնիկ նոր սպանդի առաջն առնելու համար՝ շեշտելով, որ յուրաքանչյուր լիբանանահայ կանգնած է զրկանքներով ապրող, սակայն տակավին իր կորովն ու հավատքը չկորցրած արցախացու կողքին:

Այս առիթով Պուրճ Յամուն բոլոր վաճառատներն ու հաստատությունները փակել էին իրենց դռները և ընդառաջելով հայ քաղաքական երեք կուսակցությունների կոչին՝ մասնակից դարձել հավաքին: Հավաքի ժամանակ ելույթներ ունեցան երեք կուսակցությունների ներկայացուցիչները:

ՀՀԴ-ի կողմից խոսեց Լուսինե Այվազյանը, ով նշեց, որ Հայաստանն ու Լիբանանը շրջափակված են իրենց գոյությանը սպառնացող վտանգներով: Նա կոչ ուղղեց միջազգային ընտանիքին՝ թույլ չտալու, որ այս երկու երկրները փլուզվեն, որովհետև նրանք մարդկային ու քաղաքակրթական պատգամի երկրներ են:

Անդրադառնալով Արցախի շրջափակմանը՝ նա նշեց, որ Ադրբեջանցիներն ահաբեկչական արարքներ են

գործում արցախցի պատանիների և անգն ժողովրդի վրա՝ ստեղծելով անմարդկային քաոս, որը հիշեցնում է 1915-ի Հայոց ցեղասպանությունը:

«Այսօրվա մեր հավաքի նպատակն է՝ դատապարտել Արցախի դեմ գործված՝ Ադրբեջանի և Թուրքիայի ոճրային շրջափակումը, և հաստատել մեր գորակցությունը Արցախին և արցախցիներին, ինչպես նաև Հայաստանի սահմանամերձ շրջաններին: Կոչ ենք ուղղում միջազգային ընտանիքին և միջազգային կազմակերպություններին՝ անմիջապես դիմելու պետք եղած միջոցառումներին և ստիպելու, որ Ադրբեջանը վերջ տա ազատ Արցախի անիրավ շրջափակմանը: Արցախի ապագան անվիճելի է, նրա ապագան անկախությունն է ու ազգային ինքնորոշման իրավունքը: Այս է մեր ուխտը բոլոր նահատակների և այս սուրբ իրավունքի համար պայքարած հերոսների առաջ», - իր ելույթում ասաց Լ. Այվազյանը:

Այն պահին, երբ Պուրճ Յամունում լիբանանահայության բոլոր հատվածներն իրենց գորակցությունն էին հայտնում Արցախին և պահանջում Բերձորի միջանցքի վերաբացումը, Այնճարի մեջ ևս տեղի ունեցավ նմանօրինակ գորակցական հավաք:

Այնճարի և Չախլեի հայությունը համախմբվեց Այնճարում՝ բողոքելու համար Ադրբեջանի հակահայ քաղաքականության դեմ: Ելույթներով հանդես են եկել կուսակցական ու հոգեւոր շրջանականների ներկայացուցիչներ:

Հայ դատի Ամերիկայի հանձնախմբի առաջնորդությամբ Ամերիկայի Միացյալ Նահանգներում ձեռավորվել է «Save Karabakh» կոալիցիան: Այս նախաձեռնությունը հաջորդել է ԱՄՆ Կոնգրեսում Արցախի շրջափակման ադրբեջանական քաղաքականությունը դատապարտող երկկուսակցական բանաձեւի շրջանառության մեջ դնելուն, որը նախաձեռնել են Կոնգրեսի հայկական խմբի համանախագահներ Ֆրենք Փալոնը, Գուս Բիլիթակիսը, Ադամ Շիֆը, Դավիթ Վալադաուն և ԱՄՆ Ներկայացուցիչների պալատի արտաքին հարաբերությունների հանձնաժողովի ավագ անդամ Բրեդ Շերմանը:

Բանակն անպարտելի է, երբ այն առաջնորդում են ոգով արիները, պատիվ եւ ազգային արժանապատվություն ունեցողները

Հունվարի 28-ին լրանում է Հայոց բանակի կազմավորման 31-րդ տարեդարձը: Տոնի առթիվ շնորհավորական ուղերձ է հղել Ն.Ս.Օ.Տ.Տ. Պարեգին Երկրորդ Ամենայն Հայոց Կաթողիկոսը:

«Հայոց բանակը կազմավորվեց մեր անկախության վերահաստատման տարիներին, դարձավ պատվարն ու պահպանը հայոց վերածնյալ պետականության, երաշխավորը մեր ժողովրդի խաղաղ ու անվտանգ կյանքի: Մեր խիզախ զորավարների ու զինվորների քաջագործություններով, նաեւ բանակին սատարող մեր ժողովրդի պայքարով ազատագրվեց Արցախ աշխարհը, եւ արցախահայությունն իր անկախ կյանքը կառուցելու հնարավորություն ունեցավ:

Արցախյան 44-օրյա աղետալի պատերազմը, անցյալ տարվա սեպտեմբերին Հայաստանի սահմանների նկատմամբ ոտնձգությունները, հառնած մարտահրավերները եւ պաշտպանական լրջագույն հիմնահարցերը նոր հրամայականների առջեւ են կանգնեցրել մեր երկիրն ու ժողովրդին: Այս ծանր իրավիճակում առաջնային եւ հրատապ է բանակի արդիականացումը՝ ժամանակի չափանիշներին ու պահանջներին համապատասխան: Առաջնային եւ հրատապ է ազգային ողջ ներուժի համախմբումը, որպեսզի Հայոց բանակը շուտափույթ հաղթահարի պատերազմի պատճառած աղետալի հետեւանքները, ամոքում գտնեն անդամալի կորուստների վերքերն ու ցավերը եւ բացառվեն այնպիսի ողբերգություններ, որ ապրեցինք շաբաթներ առաջ: Հավատում ենք, որ Հայոց բանակը պիտի վերագտնի փառքի իր ճանապարհը եւ կարող լինի աննկուն ու հաղթական իրագործել իր սրբազան առաքելությունը:

Ի խորոց սրտի աղոթում ենք հայրենիքի պաշտպանության համար նահատակության պսակն ընդունած բոլոր քաջորդիների համար: Հայցում ենք

Երկնավորից, որ մխիթարություն պարգևի կորուստներից ու վշտերից բեկված հոգիներին: Թող Ամենակալն Աստված Իր պահպանությունն ու զորակցությունը շնորհի Հայոց բանակի քաջարի զինվորներին ու հրամանատարական կազմին, խաղաղություն ու բարօրություն՝ Հայաստան ու Արցախ մեր հայրենիքին եւ աշխարհասփյուռ մեր ժողովրդին»:

Մեծի Տանն Կիլիկիո Արամ Ա կաթողիկոսի ուղերձում ասվում է. «Հայոց բանակի օրը հրավեր է յուրաքանչյուր հայի համար՝ իր խոր հարգանքը ու բարձր գնահատանքը հայտնելու Հա-

նել մեր բանակը՝ աղոթելով յուրաքանչյուր զինվորի անվտանգության համար ու Հայոց բանակին տալով՝ ինչ որ հրամայական է հատկապես ներկա ժամանակներում»:

Բանակի օրվա առթիվ ուղերձներ են հղել նաեւ ՀՀ Երկրորդ եւ Երրորդ նախագահները:

Նախագահ Ռոբերտ Զեչարյանի շնորհավորական ուղերձում ասվում է.

«Շնորհավորում եմ Հայոց բանակի օրվա առթիվ: Մեր բանակն անցնում է ամենօրյա փորձությունների միջով:



յաստանի ու Արցախի անկախության, հողային ամբողջականության ու անվտանգության պաշտպանության համար իր արյունը թափելու պատրաստ հայոց քաջ բանակին:

Արդարեւ, հայոց բանակը մեր հայրենիքի հզորության աղբյուրն է ու մեր ազգի միության առանցքը: Մեր հայրենիքին սպառնացող վտանգների դեմ մեր իրավունքներն ու արժեքները պաշտպանող եւ մեր հավաքական հավատքն ու վճռակամությունը մարմնացնող հզոր ուժն է Հայոց բանակը:

Հետեւաբար, հարկ է ավելի հզորաց-

վարծես չի արվում ոչինչ, որ բանակը վերջապես ուղղի մեջքը: Ուզում եմ հավատալ, որ այս իրավիճակը շտկվելու է, եւ Հայոց բանակը վերանվաճելու է Հայաստանի եւ Արցախի անվտանգության երաշխավորի դիրքերը»:

Նախագահ Մերժ Սարգսյանի ուղերձում ասվում է, որ ցանկացած ազգ եւ պետություն դատապարտված է չգոյության, քանի դեռ չի գիտակցել, որ իր լիներության առաջին գրավականը բանակն է. չկա բանակ՝ չկա եւ չի լինելու պետություն:

«Ցանկացած բանակ դատապարտ-

ված է չգոյության, եթե այն ղեկավարում է պարտությունը հաղթանակ համարող բարոյագուրկ վախկոտը:

Օտար, թեկուզ բարեկամ, պետության բանակը երբեք չի պաշտպանի որեւէ ազգի ու պետության սահմաններն այնպես, ինչպես իր հայրենի հողը, պետությունն ու ծնողին պաշտպանող զինվորը:

Ուզում ենք հաղթող բանակ՝ չպիտի ունենանք երկիրն ու բանակը անտերության մատնած թուլամորթ, բարոյագուրկ ղեկավար:

Բանակն անպարտելի է, երբ այն առաջնորդում են ոգով արիները, պատիվ եւ ազգային արժանապատվություն ունեցողները:

Թշնամուն ծնկի բերած մեր երբեմնի հզոր բանակը միջ համարողները միտումնավոր անարգում են հազարավոր քաջորդիների հիշատակը եւ գիտակցաբար հուսահատության մղում մեր ժողովրդին», - ասված է ուղերձում:

ՀՀ պաշտպանության նախկին նախարար, «Հայաստան» խմբակցության ղեկավար Սեյրան Օհանյանի հղած ուղերձում նշվում է, որ 2020-ի պարտությունը դավադիր էր, բանակին հարվածեցին նաեւ թիկունքից, բայց միանշանակ է եւ այն, որ առջեւում հաղթանակներ դեռ լինելու են:

«Ես վստահ եմ՝ հայկական բանակն ամենաառաջինն է ուղղելու իր վիրավոր մեջքը եւ ամուր կանգնելու է սեփական հողի, սահմանի վրա:

Հայկական բանակը վերականգնելու է իր երբեմնի ուժն ու հեղինակությունը եւ նորից անվտանգության երաշխավոր, պաշտպան է դառնալու վիրավոր Արցախի, Հայաստանի համար, բայց դա միայն բանակի խնդիրը չէ, այլ մեզանից յուրաքանչյուրի, ողջ ժողովրդի: Բանակը պաշտպանել է մեզ եւ ծանրագույն պայմաններում այսօր էլ մեր պաշտպանն է: Ամուր թիկունք, վահան դառնանք նրա համար», - ասվում է ուղերձում:

Ապառաժ

Ի գորակցություն շրջափակված Արցախի

1 ← Հիշյալ կռաւիցիայի մասին հայտարարությունը կատարվել է հունվարի 27-ին Կապիտուլիումի բարձունքում տեղի ունեցած ասուլիսի ժամանակ: Ասուլիսին մասնակցել են ԱՄՆ կրոնական ազատության հարցերով նախկին դեսպան, սենատոր Սեմ Բրաունբերքը, ԱՄՆ-ում Արցախի ներկայացուցիչ Ռոբերտ Ավետիսյանը, Հայ դատի հանձնախմբի ներկայացուցիչներ:

Մասնակցել են նաեւ կռաւիցիոն կազմակերպությունների ներկայացուցիչներ՝ մասնավորապես՝ «Միջազգային եւ կառավարական հարցերով անգլիական գրասենյակից», Բարոնուսի Զերոլայն Զոքսի կողմից հիմնադրված «ՀԱԸԹ կազմակերպությունից», «Խոցելի ժողովուրդների նախագծից», «Genocide watch»-ից, «Հունա-ամերիկյան առաջնորդության խորհրդից», «Ի պաշտպանություն քրիստոնյաների» եւ այլ կազմակերպություններից: Կռաւիցիային միացած կազմակերպությունների ընդհանուր թիվը քսան է:

Իր ելույթում Հայ դատի Ամերիկայի հանձնախմբի Վաշինգտոնի գրասենյակի տնօրեն Արամ Համբարյանը արձանագրել է. «Սա բազմազան կռաւիցիա է՝ նպատակ ունենալով փրկել Արցախը: Մենք ուս ուսի կանգնած ենք մեր կռաւիցիայի հետ եւ համերաշխ



ենք Կոնգրեսի մեր ընկերների հետ, ովքեր առաջ են մղում ապաշրջափակման օրենսդրությունը, որը նախատեսվում է ներկայացնել ԱՄՆ Ներկայացուցիչների պալատում: Այժմ, առավել քան երբեք, հայ եւ դաշնակից ամերիկացիները պետք է ոտքի կանգնեն եւ բարձրացնեն իրենց ձայնը»:

Ասուլիսի ընթացքում ելույթ են ունեցել, Արցախի շրջափակման անդրադարձել, ԱՄՆ իշխանություններից որոշակի գործողություններ պահանջել ու ադր-

բեջանական քաղաքականությունը դատապարտել կոնգրեսականներ Բրեդ Շերմանը, Ջուդի Չուն, Դավիթ Վալադան, Բարբարա Լին, Նիկոլե Մալիտակիսը, Ջիմ Կոստան, Լու Զորեան, դեսպան Սամ Բրոունբերքը, Ռոբերտ Ավետիսյանը:

Հունվարի 27-ին Թեհրանի Սուրբ Սարգիս առաջնորդանիստ եկեղեցում տեղի ունեցավ համահավաք՝ ի գորակցություն Արցախի եւ արցախահայության՝ հազարավոր իրանահայերի մասնակցությամբ:

Հանրահավաքի ընթացքում ելույթ ունեցան Թեհրանում գտնվող՝ ԱՀ ՄԻՊ Գեղամ Ստեփանյանը, ՀՀ ԱԺ «Հայաստան» խմբակցության պատգամավոր Ասպրամ Կրպեյանը եւ ԹՀԹ Թեմակալ Առաջնորդ Գերշ. Տեր Սեպուհ արք. Սարգսյանը, ինչպես նաեւ հեռարձակվեց Արցախի Թեմի առաջնորդ

Կրթանես Եպիսկոպոս Աբրահամյանի ուղերձը:

Բողոքի վերջում ընթերցվեց մասնակիցների հայտարարությունը, որոնք պահանջեցին միջազգային ատյանների, մասնավորապես՝ Իրանի Իսլ. Հանրապետության անմիջական միջամտությունը՝ վերաբացելու Արցախն ու Հայաստանն իրար կապող Բերձորի (Լաչին) միջանցքը, ինչպես նաեւ ստեղծելու Արցախի բնիկ հայ ժողովրդին աղբրեջանական ցեղասպանական արարքներից պաշտպանելու գործիքակազմ:

Շարունակվող շրջափակումն անընդհատ ի հայտ է բերում նոր խնդիրներ

Շրջափակման հետեւանքով Արցախում առաջացած խնդիրների մասին «Ապառաժ»-ը հարցեր է ուղղել ԱՀ տեղեկատվական շտաբին:

- Ինչպե՞ս է հաջողվում հաղթահարել շրջափակման հետ կապված օրեցօր ավելացող խնդիրները: Այս առումով ի՞նչ լիազորություններ ունի օպերատիվ շտաբը:

- Օպերատիվ շտաբի լիազորությունները սահմանված են ԱՀ նախագահի համապատասխան հրամանագրով: Այս ընթացքում հաջողվել է լուծում գտնել մի շարք հրատապ հարցերի, որոնք չլուծելու դեպքում կարող էին մի շարք ոլորտներում կոլապսի հանգեցնել: Այդուհանդերձ, շարունակվող շրջափակումն աննախադեպ իրավիճակ է ստեղծում եւ անընդհատ ի հայտ է բերում նոր խնդիրներ, որոնք փորձ է արվում եղած հնարավորությունների պայմաններում կարգավորել:

- Արդարացնո՞ւմ է իրեն արդյոք կտրոնային համակարգը, հնարավո՞ր է այլ ապրանքների ձեռք բերման համար եւս կտրոններ սահմանվեն:

- Կտրոնային համակարգին անցնելու արդյունավետության գնահատականը, թերեւս, ավելի ճիշտ քաղաքա-

ցիները կարող են տալ: Կարելի է արձանագրել, որ հաջողվել է սահուն կերպով համակարգի անցումն ապահովել, դրա համար կատարվել է կազմակերպչական եւ տեխնիկական մեծ աշխատանք: Համակարգի ներդրումը որոշակի չափով մեղմել է պարենային խնդիրը, սակայն շրջափակման հետեւանքով բնակչությունը շարունակում է զրկված մնալ մի շարք կարեւոր ապրանքատեսակներ ձեռք բերելու հնարավորությունից:

Ինչ վերաբերում է կտրոնով վաճառվող ապրանքների ցանկի ընդլայնմանը, ապա, դա կորոշվի՝ հաշվի առնելով առկա հնարավորությունները:



- Քայլեր ձեռնարկվո՞ւմ են արդյոք առողջապահական տեսակետից լիարժեք, բալանսավորված սնունդ ապահովելու համար:

- Շրջափակման հետեւանքով խախտվում են Արցախի բնակչության մի շարք հիմնարար իրավունքներ, որոնցից մեկն էլ պատշաճ սնվելու իրավունքն է: Խնդիրը բավականին սուր է, եւ օպերատիվ շտաբը համապատասխան լիազոր մարմինների, մասնավորապես, առողջապահության նախարարության հետ աշխատանքներ է իրականացնում՝ ստեղծված բարդ իրավիճակում հնարավոր արդյունավետ լուծումներ գտնելու համար:

- Ինչպե՞ս է լուծվում վառելիքի խնդիրը, վտանգ կա՞, որ որոշ ժամանակ անց ներքաղաքային, միջշրջանային տրանսպորտը վառելիքի պատճառով չհասնի:

- Շրջափակումից անմիջապես

հետո օպերատիվ շտաբի որոշմամբ գույքագրվել են եղած վառելիքի պաշարները, որոշում է կայացվել անցնել խիստ խնայողական ռեժիմի, որպեսզի հնարավոր լինի ապահովել շտապ օգնության, հատուկ ծառայությունների աշխատանքը: Ներքաղաքային, միջշրջանային տրանսպորտը աշխատում է, բայց ավելի պակաս քանակի տրասպորտային միջոցներով: Հանրության ծառայություններ մատուցող կազմակերպությունների անխափան գործունեությունն ապահովելու նպատակով՝ խնայողական խիստ ռեժիմի պահպանումը շարունակվում է:

- Հետպատերազմյան շրջանում բավականին զոււմարներ են հատկացվել շերմոցային տնտեսությունների զարգացման համար: Ծրագրվո՞ւմ է արդյոք այդ շերմոցները պարենային խնդիրների լուծման համար օգտագործել:

- Պարենային ապահովման խնդիրն ամենակարեւոր առաջնահերթություններից մեկն է, եւ այդ տեսանկյունից գյուղատնտեսությունը եւ այս բնագավառում իրականացվող ծրագրերի արդյունավետության բարձրացումը, անկասկած, դառնում են առանցքային ուղղություններից մեկը:

Ապառաժ

Հունվարի 30-ից վերսկսվել է ուսումնական հաստատությունների դասագործընթացը

Անխափան գազամատակարարման պարագայում հունվարի 30-ից կվերսկսվի Արցախի Հանրապետության բոլոր հանրակրթական դպրոցների նախադպրոցական խմբերի (առանց սննդի, ժամը 9:00-13:00), 1-12-րդ դասարանների, արտադպրոցական (երաժշտական եւ արվեստի դպրոցներ, մարզադպրոցներ ու մանկապատանեկան ստեղծագործական կենտրոններ) եւ նախնական (արհեստագործական) ու միջին մասնագիտական ուսումնական հաստատությունների դասագործընթացը: Այս մասին հայտարարություն է տարածել ԱՀ կրթության, գիտության, մշակույթի եւ սպորտի նախարարությունը:

«Գազամատակարարման խափանման դեպքում կվերսկսվեն միայն 9-12-րդ դասարանների դասերը, համապատասխան պայմաններում՝ հատուկ գրաֆիկով, որի վերաբերյալ կտրամադրվի լրացուցիչ տեղեկատվություն»,- ասվում է հաղորդագրության մեջ:

ԿԳՍՍ նախարարությունը տեղեկացնում է, որ համապատասխան կառույցների կողմից տարվում են աշխատանքներ բնական գազով ջեռուցվող ուսումնական հաստատություններում ջեռուցման համակարգերը վերափոխելու ուղղությամբ:

Միաժամանակ նախարարությունը ծնողներին հորդորում է երեխաներին հագցնել տաք հագուստ:

Գազամատակարարման եւ էլեկտրամատակարարման անկայունությունը բացասաբար է անդրադառնում դպրոցական երեխաների վրա. ասվում է Արցախի տեղեկատվական շտաբի հայտարարության մեջ:

Արցախ մտնող միակ գազատար խողովակի աշխատանքը Ադրբեջանի կողմից հաճախակի խափանելու եւ էլեկտրամատակարարման հովհարային անջատումների պատճառով Արցախի մի շարք դպրոցներում ստիպված կրճատվել է դասաժամի տեւողությունը՝ դառնալով 35 րոպե, ինչը բացասաբար է անդրադառնում կրթության որակի վրա:

Արցախում հավանաբար կվերանայվի հովհարային անջատումների ժամանակացույցը

Հունվարի 9-ից ադրբեջանական վերահսկողության տակ գտնվող տարածքից անջատվել էր Հայաստանից դեպի Արցախ էներգասնուցումը: Ադրբեջանական կողմը հնարավորություն չի տալիս մասնագետներին մոտենալ եւ հասկանալ պատճառները՝ անհրաժեշտության դեպքում վթարավերականգնողական աշխատանքներ իրականացնելու համար:

Արցախը սնուցող բարձրավոլտ էլեկտրահաղորդման գծի վթարը հնարավոր է վերականգնել ժամերի ընթացքում, սակայն ադրբեջանական կողմը խոչընդոտում է. «Արցախէներգո»-ի տնօրեն:

Ըստ Անդրանիկ Կաչատրյանի՝ հաշվի առնելով, որ արդեն մոտ մեկ ամիս է՝ ադրբեջանցիները հնարավորություն չեն տալիս վթարավերականգնողական աշխատանքներ իրականացնել, դա հիմք է տալիս կասկածելու, որ արհեստական միջամտություն է եղել: Ընդ որում, վթարը բարդ հետեւանքներ չի ունեցել եւ այն կարելի է վերականգնել ժամերի ընթացքում:

Այս պահին էլեկտրաէներգիայի սպառումն ապահովվում է Սարսանգի ՀԵԿ-ի հաշվին, բայց դրա հնարավորությունները սահմանափակ են, եւ եթե ստեղծված իրավիճակը պահպանվի, լուրջ հետեւանքներ են լինելու: Չի բացառվում, որ առաջիկայում ստիպված վերանայվի հովհարային անջատումների ժամանակացույցը՝ կախված է ջրի պաշարներից ու մասնագետների հաշվարկներից: Հովհարային անջատումները բացասական ազդեցություն են ունենում տնտեսության վրա: Անջատվել են խոշոր ընկերությունների էլեկտրամատակարարումը՝ բեռի թեթեւացման պատճառով:

Հովհարային անջատումներից բացի, օդային գծերի գերծանրաբեռնված լինելու հետեւանքով առաջացած վթարների պատճառով որոշ ժամերի մարդիկ կրկին հոսանք չեն ունենում: Էլեկտրաէներգիայի ունեցած սահմանափակ ռեսուրսների պատճառով հիվանդանոցների, գիշերօթիկ հաստատությունների, տարեցների խնամքի եւ նման այլ հաստատությունների բնականոն աշխատանքի ապահովումը նույնպես մեծ դժվարությամբ է իրականացվում: Ձեռնարկվում են այլընտրանքային միջոցներ սոցիալապես խոցելի խմբերի կենսական նվազագույն պայմանները ապահովելու համար:

ԱՀ առողջապահության նախարարության ենթակայության տակ գործող բոլոր բուժհաստատություններում պլանային վիրահատությունների դադարեցման պատճառով 560 քաղաքացի զրկվել է վիրահատվելու միջոցով առողջական խնդիրների լուծման հնարավորությունից: Ստեղծված տնտեսական բարդ իրավիճակի պատճառով նախնականորեն առնվազն 5100 մարդ կորցրել է աշխատանքը եւ եկամտի աղբյուրը:

Ավելի քան 20,800 տոննա կենսական նշանակության ապրանքներ կմակատարարվեն Արցախ, եթե չլիներ շրջափակումը, որի ընթացքում Կարմիր խաչի միջազգային կոմիտեի եւ ՌԴ խաղաղապահ զորակազմի կողմից մատակարարվել է դրա միայն չնչին մասը:

Տարեւիկ ԱՂԱԶՆԱՅԱՆ

ՀՕՍ-ը 10 տոննա պարենամթերք է տրամադրել Արցախին

Հայ Օգնության Միությունը (ՀՕՍ) Հայաստանի եւ Արցախի Հանրապետության անկախացումից ի վեր իր աշխատանքները գլխավորաբար կենտրոնացրել է հայրենիքի հզորացման հատկապես քաջարի Արցախի ժողովրդի բարօրության համար:



Արցախի Հանրապետությունը ավելի քան հիսուն օր շրջափակման մեջ է, եւ 120.000 արցախահայերը գոյատեւման պայքար են մղում Արցախը կանգուն պահելու համար:

Խորապես գիտակցում ենք, որ դժվարին այս օրերին ճգնաժամը դիմագրավելու համար Արցախը ավելի քան երբեւէ մեր միասնության եւ օգնության կարիքն ունի:

Կարեւոր այս հրամայականի հիման վրա, ինչպես նաեւ հավատարիմ մնալով «Ժողովրդիս հետ, ժողովրդիս համար» իմաստալից իր կարգախոսին, ՀՕՍ-ի Հայաստանի շրջանը շուրջ 10 տոննա պարենամթերք է հանձնել Արցախի Հանրապետության ներկայացուցչությանը:

Մենք միշտ Արցախի կողքին ենք: Օրհասական այս օրերին կոչ ենք անում ՀՕՍ-ի մեծ ընտանիքին ու համայն հայությանը՝ օգնության ձեռք մեկնել քաջարի արցախահայությանը, որը հերոսաբար կառնած է պապեական մեր հողերին եւ արթուն պահակ է արյան գնով ազատագրած իր հայրենիքին: Արցախը մերն է եւ մնալու է հայկական:

Հայ Օգնության Միության Հայաստանի Շրջանային վարչություն

Ներկա պահին ամեն ինչի քանակը սահմանափակ է

Արցախի շրջափակման պայմաններում ամենաառաջնային խնդիրներից մեկը շարունակում է մնալ դեղերի, մանկական կերերի, հիգիենայի պարագաների հայթայթումը:

Դեղատան աշխատող Նոնա Մարտիրոսյանի խոսքով՝ սկզբնական շրջանում, մինչև դեկտեմբերի 25-ը ամեն ինչ դեֆիցիտ էր, հատկապես՝ մանկական կերերը, ջերմիջեցնողները, հակաբիոտիկները:

«Դրանից հետո սկսել ենք քիչ քանակությամբ դեղորայք ստանալ, բայց ներկա պահին ամեն ինչի քանակը սահմանափակ է:

Մարդիկ դիմում են, տարբեր դեղեր են պատվիրում, եւ չենք կարողանում ժամկետ նշել, թե երբ կհասնի, կամ կհասնի՞» արդյոք,- ասում է Նա:



Դեղատանը հիմա էլ տակդիրներ չկան, միայն մանկական կերեր են, սակայն, նրա խոսքով, երեխաներին անհրաժեշտ են հավելյալ կերեր, պյուրեներ, պեչենիկներ, հատկապես՝ որ բանջարեղեն ու միրգ չկա:

«Հիմնականում մանկական հակաբիոտիկներն են շատ գնում: Տարբեր հիվանդությունների դեպքում տարբեր չափաբաժնով հակաբիոտիկներ են պետք, բայց մենք միայն մի ձեւ ենք կարողացել ձեռք բերել:

Տրամադրում ենք փոխարինողները: Մանկական կերերը ստացել ենք, բայց միայն սահմանափակ տեսակներից: Շատ երեխաների համար հատուկ մոտեցում է պետք, որը չենք կարողանում ապահովել,- ասում է Ն. Մարտիրոսյանը:

S. U.

Շրջափակման պայմաններում էլ հնարավոր է նվազագույնի հասցնել կրթությանը հասցված վնասները



«բլոկադա»... Միանշանակ, յուրաքանչյուր ասպարեզ նման իրավիճակում մեծ կորուստներ է ունենում: Անշուշտ, կրթությունն անմասն չի մնում: Այս եղանակին ուսումնական պրոցեսն անցկացնելու, աշակերտների բարեկեցության հետ կապված մտահոգություններն ավելի շատ են, քան երբեք: Կրթության շարունակական ընդհատումներն իրենց բացասական ազդեցությունը կթողնեն, եւ կրթական աղքատության ցուցանիշը, բնականաբար, կբարձրանա, կրթական ճգնաժամը էլ ավելի կխորանա, եթե աշակերտների կրթական իրավունքի խախտումը երկար տեւի,- ասում է ուսուցչուհին:

ԱՅ Մարտունու շրջանի Սոսի Երկաթուղային դպրոցի համակարգող ուսուցչուհի Մարինե Հովսեփյանի խոսքով՝ Երկաթուղային դպրոցների ստեղծումը կրթության ոլորտում ամենահաջողված ծրագրերից է, որը մտցվել էր պատերազմից հետո: Իր առջեւ դնելով բազմաթիվ նպատակներ, այն լուծում է աշակերտների զբաղվածության հարցը, օգնում դասապատրաստման հարցում, վերհանում աշակերտների թաքնված կարողությունները եւ, իհարկե, աշակերտները ստանում են բալանսավորված, առողջարար սնունդ: Սակայն շրջափակման հետեւանքով աշակերտները զրկվել են նաեւ այս օգտակար նորամուծությունից:

Շրջափակման պայմաններում էլ, Մարինե Հովսեփյանի կարծիքով, հնարավոր է նվազագույնի հասցնել կրթությանը հասցված վնասները. «Չաշվի առնելով, որ այս դժվարությունները հաղթահարում ենք հանուն մեր պետականության, անկախության պահպանման, կարծում եմ, կարելի է այլընտրանքային մեթոդներով գոնե նվազագույն վնասներով դուրս գալ այս վիճակից:

Համավարակի ժամանակ, ինչպես ամբողջ աշխարհում, այնպես էլ մեզ մոտ, անցում է կատարվել հեռավար ուսուցման, սակայն այժմ, հոսանքի հաճախակի անջատումների հետ կապված, անհնար է նույն կերպ կազմակերպել: Որպեսզի աշակերտները զրկված չլինեն ուսումնառությունից, կարելի է, օրինակ, ձայնագրել դասը, հանձնարարությունը եւ ուղարկել, վերահսկել: Համավարակի ժամանակ, հիշում եմ, բավականին մատչելի եւ բավանդակալից հեռուստագրեր, բաց դասեր էին թողարկվում. կարելի է այդ բազայից օգտվել:

Նրա խոսքով՝ իհարկե, որքան էլ լավ կազմակերպվի այդ ամենը, երբեք չի փոխարինի դպրոցում ուսուցիչ-աշակերտ կենդանի շփմանը, բայց գոնե ուսումնական կորուստները որոշակի չափով կնվազեցվեն: Բացի այդ, աշակերտները կկենտրոնանան դրական, օգտակար գործի վրա: Ցավոք, այս ցուրտ պայմաններում երեխաներն ամբողջ օրը ձանձրանում են, իսկ հեռախոսներից կախվածությունը՝ աճում:

S. U.

Պետք է միջազգայնացնել խնդիրը

Հունվարի 19-ից Արցախում դադարեցվել է նաեւ դպրոցների եւ միջին մասնագիտական ուսումնական հաստատությունների դասագործընթացը: Պատճառը Ադրբեջանի կողմից Հայաստանից դեպի Արցախ գազամատակարարման եւ էներգամատակարարման խափանումն է:

ԱՅ Մարտակերտի շրջանի Կիլիսի եւ Ղազանչիի Կարեն Առաքելյանի անվան միջնակարգ դպրոցի տնօրեն Չորայր Աբրահամյանը «Ապառաժ»-ի հետ զրույցում մտահոգություն է հայտնում, որ 2020թ. հետո կորուսված կրթությանը համավարակի, պատերազմի, համավարակի նոր ալիքի, այժմ էլ շրջափակման հետեւանքով անընդհատ ուսումնական գործընթացը տուժել է, ինչը աշակերտների վրա խիստ զգացվում է:



Ծիշտ է, փորձում են հավելյալ պարամունքներով, տեղեկություններ տրամադրելով, տարբեր միջոցառումների միջոցով ծրագիրը նորից կրկնել, որպեսզի աշակերտները գոնե կորցրածի մի մասը ստանան, վերհիշեն, բայց դա բավարար չէ: «Հունվարի 24-ին նշվում է կրթության միջազգային օրը, բայց մենք այդ օրը նույնիսկ կրթությունը դպրոցում վերականգնելու հնարավորություն չունենք: Իմ կարծիքով՝ պետք է միջազգայնացնել խնդիրը, շեշտել, որ Արցախի երեխաները զրկված են նաեւ իրենց կրթության իրավունքից: Ոչ ոք իրավունք չունի երեխային զրկելու կրթություն ստանալու իրավունքից,- նշում է Չ. Աբրահամյանը:

Խոսելով այս օրերին ուսուցիչների եւ աշակերտների տրամադրությունների մասին՝ նա նշում է, որ բոլորը նույն հոգեվիճակում են գտնվում եւ ցանկանում են օր առաջ վերականգնված տեսնել ուսումնական գործընթացը: «Ճնողներից ենք անընդհատ դիմումներ ստանում, թե ինչ է լինելու, երբ են վերաբացվելու դպրոցները. բոլորին հուզում է այդ հարցը: Դպրոցներ կան, որոնք էլեկտրականությամբ ու գազով էին ջեռուցվում, դա հասկանալի է, բայց կարելի էր ինչ-որ ձեւով կազմակերպել, որ թեկուզ կարճ ժամով դասադրոցները շարունակվեին կամ փայտով ջեռուցվող դպրոցներում բնականոն հունով կազմակերպվեին: Այս հարցը բարձրաձայնել ենք, ասացին, որ քննարկում են: Երեւի ինչ-որ որոշում կլինի մոտ ժամանակներում, կոնկրետ տեղեկություն չունենք,- նշում է տնօրենը:

Խոսելով դասերը առցանց կազմակերպելու տարբերակի մասին՝ նա տեղեկացրեց, որ այդ հարցը չեն քննարկել, քանի որ գյուղում ինտերնետ կապը թույլ է. «Հոսանքի հովիտարային անջատումներից հետո էլ մի քանի ժամ, մինչև ինտերնետը կարգավորվում է, արդեն հաջորդ անջատման ժամն է մոտենում: Բացի դրանից, քանի որ ամեն օր տարբեր ժամերի են հոսանքն անջատում, հնարավոր չէ հստակ դասացուցակ պահել: Ունենք նաեւ տեխնիկական խնդիրներ: Բազմազան ընտանիքներ կան, որոնք բնակամասերում չեն հեռանում, որպեսզի աշակերտները զբաղեցնեն տարբեր սենյակներ եւ մասնակցեն դասերին»:

Չորայր Աբրահամյանը նաեւ հավելեց, որ տրանսպորտի, վառելիքի հետ կապված խնդիր կա, որի պատճառով 2 ուսուցիչ չեն կարողանում Առաջածոր համայնքի ժամանել աշխատանքի, իսկ մեկ աշակերտ էլ գտնվում է ՀՀ-ում եւ շրջափակման հետեւանքով չի կարողանում վերադառնալ գյուղ:

Հ.Գ. Հարցազրույցը կայացել է հունվարի 26-ին, երկու օր անց ԱՅ ԿԳՄՍ Նախարարությունը հայտարարություն է տարածել, որ անխափան գազամատակարարման պարագայում հունվարի 30-ից կվերսկսվի Արցախի Հանրապետության բոլոր հանրակրթական դպրոցների նախադպրոցական խմբերի (առանց սննդի, ժամը 9:00-13:00), 1-12-րդ դասարանների, արտադպրոցական (երաժշտական եւ արվեստի դպրոցներ, մարզադպրոցներ ու մանկապատանեկան ստեղծագործական կենտրոններ) եւ նախնական (արհեստագործական) ու միջին մասնագիտական ուսումնական հաստատությունների դասագործընթացը: Հունվարի 31-ի դրությամբ դեպի Արցախ գազամատարարումը չի ընդհատվել:

Տաթևիկ ԱՐԱՋԱՆՅԱՆ

Սրա սկիզբն ու վերջը չի երեւում

«Ինչպե՞ս է շրջափակում անդրադառնում Ձեր աշխատանքի վրա»: «Շատ վատ»,- պատասխանում է Ստեփանակերտի կենտրոնական շուկայում աշխատող Ջուլիետա Գասպարյանը: «Մարդիկ սովորության համաձայն արթնանում, գործի, դպրոց են գնում, բայց ոչ մի բան չեն հասկանում այս կյանքից: Սրա սկիզբն ու վերջը չի երեւում»,- ասում է նա:

Նրա խոսքով՝ շուկան որոշ չափով աշխատում է, բայց շատ մարդիկ անգործ են մնացել, խանութները լրիվ դատարկվել են, ռեստորաններ են փակվել: «Ոչ մի բան չենք թանկացրել: Որոշ ապրանքներ՝ պանիր, ձու, գյուղից հատուկներ բերում են, չնայած գինն էլ բարձրացել է, չենք հասցնում գնել գյուղացուց: Բոլորի տանն էլ ուտելիքի որոշ պաշար կա: Խնդիրը նրանում է, որ երեխան մի՞թե, բանջարեղեն չի ուտում»,- շարունակում է Ջուլիետան:

1993թ. Զարվաճառի ազատագրման մարտերից հետո Ջուլիետան իր ամուսնուն չի տեսել, վերջինս համարվում է անհայտ կորած: 1996-ից շուկայում աշխատող Ջուլիետան նշում է, որ այն ժամանակ էլ



դժվարություններ կային, ապրանքներ դժվարությամբ էին գտնում, սերտ կապեր չկային դրսի հետ: «Բայց առաջին պատերազմից հետո մարդիկ լավ են ապրել, թեկուզ հարցը լրիվությամբ չի լուծվել, թեկուզ քնտանիքները դժվարություն են քաշել, զոհեր են տվել, բայց ցավի հետ համակերպված լավ ենք տեսել, պայքարել ենք: Հիմա մի տեսակ թեւաթափ ենք, հուսահատված: Պահի տակ ուզում ենք լավը մտածել, բայց լավ բան չենք տեսնում, վախենում ենք «հետո»-ից»,- նշում է նա:

Ասում է՝ Ռուբեն Վարդանյանի հետ որոշ հույսեր էին կապում, հիմա տարբեր բան են ասում մարդիկ: Արդեն չգիտես՝ լա՞վը մտածես, թե՞ վատը: «Ես մտածում եմ, որ եթե թուրքերը նրա դեմ են, նշանակում է՝ թուրքերի կողմից չէ: Չգիտեմ, մեզ համար բաներ ենք հորինում ու հավատում, մեր կյանքից մենք էլ չենք բան հասկանում»,- ասում է Ջուլիետան:

S.Ա.

Թոնրատունն աշխատում է ծանրաբեռնված գրաֆիկով

«Շինամաչ» թոնրատան տնօրեն Գարեգին Գեւորգյանը «Ապառաժ»-ի հետ գրույցում նշեց, որ թոնրատունն աշխատում է ծանրաբեռնված գրաֆիկով՝ գիշերվա ժամը 4-ից մինչև անգամ ցերեկվա 4-ը, պարզապես այս ընթացքում էլեկտրականության հովվարային անջատումները հաճախ համընկնում են թոնրատան հիմնական աշխատաժամանակի հետ և խնդիրներ առաջացնում՝ կապված անհրաժեշտ հացի քանակի ապահովման հետ:

«Այլուր եւ անհրաժեշտ մյուս ապրանքները կան, եւ փորձում ենք աշխատանքները կազմակերպել հնարա-

վորինս արդյունավետ: Այլուրի ձեռք բերման համար դիմում ենք Օպերատիվ շտաբին: Նրանք տրամադրում են անհրաժեշտ քանակը, իսկ տեղափոխումն իրականացնում ենք մեր մեքենաներով»,- նշել է Գ. Գեւորգյանը:

«Շինամաչ» թոնրատունը օրական հասցնում է թխել տարբեր չափերի 500-ից մինչև 700 հաց, որն ավելի շատ է, քան մինչև շրջափակումն էր: Տնօրենի խոսքով՝ հերթեր չեն գոյանում, կամ շատ քիչ են լինում:

«Այս պահին աղյուսներով նոր վառարան ենք կա-

ռուցում, որն աշխատում է հոսանքով, սակայն հացերը թխում է հավասարաչափ, ավելի արագ եւ ավելի հարմար է լինելու աշխատողների համար»,- ասել է Գ. Գեւորգյանը:

Կապված աշխատանքային ծանրաբեռնվածության հետ՝ թոնրատունը նաեւ նոր աշխատող է ընդունել, որպեսզի կարողանան ապահովել սպառողներին անհրաժեշտ քանակությամբ հացով: Պարենամթերքի բացակայության պայմաններում՝ ամբողջ ծավալով աշխատելուց զրկվել է նաեւ ռեստորանային բիզնեսը:

Վ. ԽԱՉԱՏՐՅԱՆ

Մանկապարտեզների աշխատողները սպասողական վիճակում են



Արցախը Հայաստանին կապող միակ ճանապարհը Ադրբեջանի կողմից արգելափակվելու պատճառով հունվարի 9-ից նախադարձական հաստատությունների, հանրակրթական դպրոցների նախադարձական խմբերի եւ դպրոց-

ների երկարորյա ռեժիմով աշխատանքը սննդի ոչ բավարար մատակարարման պատճառով ժամանակավորապես կասեցվել է:

Շրջափակման պայմաններում սննդի սրացող սղության պատճառով՝ փակվել է 41 մանկապարտեզ, 56 նախադարձական խումբ, 20 երկարորյա ուսումնական հաստատություն: Գազի մատակարարման վերականգմամբ պայմանավորված՝ հունվարի 30-ին ԱՀ ԿԳՄՍ նախարարության որոշմամբ վերսկսվել է Արցախի Հանրապետության բոլոր հանրակրթական դպրոցների նախադարձական խմբերի (առանց սննդի, ժամը 9:00-13:00) դասագործընթացը:

Հայ Օգնության Միությունը Արցախում չորս «Սոսե» մանկապարտեզներ ունի, որոնք նույնպես շրջափակման հետեւանքով առաջացած խնդիրների պատճառով, հանրապետության մյուս մանկապարտեզների նման, այս օրերին չեն գործում:

«Սոսե» մանկապարտեզները համակարգող Արտեմիս Գրիգորյանի խոսքով՝ այս օրերին մանկապարտեզների աշխատողները սպասողական վիճակում են, ներքին ծրագրերով են զբաղվում, որպեսզի աշխատանքները վերսկսելուց հետո գործն առաջ գնացած լինի:

«Պահեստներում մաքրություն ենք անում, ներքին աշխատանքներ կատարում: Աշխատել չենք կարողանում, քանի որ գազով էին տաքացվում սենյակները, նաեւ սննդի խնդիր կա»,- ասում է Արտեմիս Գրիգորյանը՝ հավելելով, որ շրջափակման հետեւանքով վերանորոգման մեջ գտնվող Ակնաբերդի մանկապարտեզում շինարարական աշխատանքները դադարեցված են:

S.ԱՐԱՋԱՆՅԱՆ

Փորձում ենք հարմարվել նոր իրականությանը

Հնարավորինս փորձում ենք հարմարվել նոր իրականությանը, բայց խնդիրները շատ են, բազմաթիվ ու բազմապիսի՝ կապված դեղորայքի ներմուծման, դրանց քանակի, բազմազանության հետ: Այս մասին «Ապառաժ»-ի հետ գրույցում նշել է «Արեւիկ» մանկական բուժփակուղի խոսելով շրջափակման հարուցած խնդիրների մասին: «Ձմեռվա սեզոնը հանդիսանում է սուր շնչառական վարակների ծաղկման շրջան, եւ հիվանդները միշտ ավելի շատ են լինում: Դեղորայքը հասնում էր մայր Հայաստանին կապող միակ ճանապարհով, իսկ մեր պաշարները, նախարարության պաշարները, նաեւ Կարմիր խաչի կողմից բերված դեղորայքը չի կարող լրիվ ծավալն ապահովել: Հիմա մաքսիմալ տնտեսման շրջանում ենք: Երկրորդ խնդիրը կապված է էներգակիրների պակասի հետ՝ բնական գազ, էլեկտրականություն: Հիվանդանոցի կաթսայատունն աշխատում է միայն բնական գազով: Եթե նույնիսկ գազը կա, այն աշխատանքները համար հոսանք է պետք: Մի խնդիր է, երբ հոսանք չի լինում, եւ երկրորդ խնդիրն է, որ հոսանքի առկայության պարագայում այդ ծանրաբեռնվածության դեպքում չի ապահովում իր հզորությունը»,- ասում է տնօրենը: Արեւային ջրատաքացուցիչները մեծապես խնայում են էլեկտրաէներգիան, սակայն հոսանքի բացակայության պարագայում գեներատորն աշխատում է գերծանրաբեռնվածությամբ, իսկ օգտագործվող վառելիքը հիմա խնդիր է:

Ստեղծված իրավիճակում ստիպված նույն հիվանդություններով, լավացման շրջանում գտնվող երեխաներին տեղավորում են մի պալատում՝ հասկանալով հանդերձ, որ բոլորը ցանկանում են առանձին պալատներում լինել: Նոր գրաֆիկ են սահմանել՝ կրճատելով այն ծառայությունների աշխատաժամանակը, որը հնարավոր է կրճատել կամ տեղափոխել այլ ժամանակ:

«Պլանային վիրահատությունները դադար-

րեցված են, բայց դրանց ենթակա երեխաների վիճակը ժամանակի ընթացքում վատթարանում է: Այդ պատճառով ռիսկային խմբում գտնվողներին հնարավորության դեպքում պետք է վիրահատել: Ում հնարավորություն ունեցանք հետաձգել, առանց իրենց առողջական վիճակին վնաս հասցնելու, հետաձգում ենք»,- նշում է Կ. Մելքումյանը:



Նրա խոսքով՝ այս պահի դրությամբ վերակենդանացման եւ նորածնային բաժանմունքում 10 երեխա է բուժում ստանում, բայց շտապ ՀՀ տեղափոխման ցուցումով չկան: Շրջափակման օրերին հիվանդանոցից ռեանիմացիայով «Մուրացան» բժշկական կենտրոն է տեղափոխվել ծանր վիճակում գտնվող 4 ամսական մեկ երեխա: Նրա մոտ հայտնաբերվել էր լեյշմանիոզ հիվանդությունը: Կարեն Մելքումյանի խոսքով՝ երեխան հիմնական հիվանդությունից բացի՝ ուղեկցող այլ խնդիրներ ունի: Հիմնական հիվանդությամբ բուժումը շարունակում է, բայց պետք է նաեւ սրտի հետ կապված խնդիրների համար բուժում ստանա:

Տարեիկ ԱՐԱՋԱՆՅԱՆ

Ռեստորանի հաճախորդների թիվը կրճատվել է

«Կառավարությունը չի կարողանում օժանդակել, ոչ մի ձեռքով չի լուծվում, եւ ինչ մնացորդում ունեինք՝ դրանով ենք աշխատում: Եղել է հանդիպում պետախարարի հետ, սակայն որեւէ առաջարկ կամ լուծում չի հնչել, միայն ներկայացվել է իրավիճակը»,- ասել է Զ. Ավանեսյանը:

Նրա խոսքով՝ այս պահին կրճատումներ չեն նախատեսում, իրենց միջոցներից են ապահովում աշխատողների վարձատրությունը:

«Հույսներս պետությունն է: Եթե պետական ապարատին կարո-



ղանում է ապահովել, ապա հույս ենք պահում, որ մասնավոր սեկտորին եւս կկարողանան ապահովել»,- նշել է Զ. Ավանեսյանը:

Ռեստորանն այս պահին աշխատում է, սակայն մենյուի 80 տոկոսը չկա: Տեղական մթերքներով աշխատելու պարագայում՝ կարող են ապահովել միայն մենյույում առկա կերակրատեսակների 20 տոկոսը:

«Երկար ժամանակ շարունակվելու դեպքում՝ կարծում եմ կփակվի, սակայն հույս ենք պահում, որ շուտով կբացվի ճանապարհը եւ կկարողանանք վերականգնել մեր առօրյա գործունեությունը»,- եզրափակել է Զ. Ավանեսյանը:

Ի տարբերություն «Արցախ»-ի, «Բաժակ» ռեստորանի տնօրեն Հայկ Ավանեսյանի խոսքով՝ շրջափակումից հետո գրեթե հաճախորդների թիվը չի նվազել, սակայն խնդիրները միանման են. մթերքները չեն բավարարում, ընդհանուր առմամբ նվազել են:

«Հաճախորդները գալիս են, բայց չենք կարողանում տալ այն, ինչ-որ առաջ էինք տալիս: Փորձում ենք անել առավելագույնը, տեղական մթերքները հնարավորության դեպքում օգտագործելով՝ աշխատել: Սննդամթերքի մասով արտոնությունները շատ քիչ են: Առաջ միայն 12լ ձեթի կտրոն են տրամադրել, մնացածը հայթայթում ենք՝ որտեղից կարողանում ենք: Որեւէ այլ արտոնություններ չկան: Այնպիսի տպավորություն է, որ մոռացել են, որ մենք էլ ունենք աշխատողներ, պետք է աշխատենք, որպեսզի կարողանանք այդ 12 աշխատողներին ապահովել աշխատանքով»,- ասել է Հայկ Ավանեսյանը:

«Բաժակ»-ում եւս կրճատումներ չեն եղել, իսկ տնօրենն էլ հույս հայտնեց, որ չեն էլ լինի: «Մինչեւ վերջ գնալու ենք, միայն թե չենք տալու, բայց ապահովելու ենք նրանց աշխատանքը: Ես չեմ պատկերացնում սրանից հետո մեր տնտեսությունն ինչպես է ոտքի կանգնելու: Ես իմ անձնական պահուստային ֆոնդից վճարում եմ իմ աշխատողներին, շատ ժամանակ օգուտով չենք աշխատում, իմ գրպանից եմ գումար ներդնում, սակայն շատ երկար չենք կարող այսպես դիմանալ: Պետախարարի հետ հանդիպում է եղել, սակայն ոչ մի արդյունք չկա, պարզապես զրույց է եղել: Ամեն դեպքում, ես չեմ կարծում, որ մեր պետությունն այս պահին կարող է ապահովել փոխհատուցում՝ այն դեպքում, երբ հարկեր չենք վճարում: Ֆինանսի խնդիր կա: Ես կարծում եմ՝ եւս մեկ ամիս շարունակվելու դեպքում մեր տնտեսությունն ի վիճակի չի լինելու վերականգնվել»,- նշել է Զ. Ավանեսյանը:

Ճանապարհի փակ լինելու պատճառով Արցախը զրկված է նաեւ հյուրեր ընդունելու հնարավորությունից, ինչի արդյունքում հյուրանոցները չեն կարողանում իրենց գործունեությունը ծավալել:

«Արմենիա» հյուրանոցի մենեջեր Ալինա Աղաջանյանը նշել է, որ հյուրանոցային ծառայությունից օգտվողներ չկան:

«Իհարկե, մեզ վրա նույնպես շրջափակումն իր բացասական ազդեցությունն է ունեցել: Կան հյուրեր, որոնք ճանապարհի փակ լինելու պատճառով մնացել են հյուրանոցում եւ չեն կարողանում վերադառնալ, ու այսօրվա դրությամբ այս իրավիճակի գերիներն են համարվում: Շրջափակման հետեւանքով խնդիրներ ունենք՝ սննդի մատակարարման եւ էներգոապահովության խնդիրներ: Էներգիայով ապահովման հարցը լուծվում է գեներատորի միջոցով, բայց այս պահին նաեւ դիզելային վառելիք գտնելու խնդիրը կա: Սննդի ձեռք բերման համար մենք, ինչպես բոլորը, գրավոր ձեռով դիմում ենք համապատասխան մարմիններին՝ ապրանքներ ստանալու համար, հնարավորության սահմաններում, ինչպես ստացվում է»,- ասել է Ա. Աղաջանյանը:

Վ. ԿԱՉՍՏՐՅԱՆ

30 000 երեխաներ զրկվել են կրթություն ստանալու հնարավորությունից

Մենք այն երջանիկներից ենք, ովքեր ունեցել են ուրախ ու անհոգ մանկություն: Ճիշտ է, չունեինք խաղալիքներ, Արցախյան առաջին պատերազմից հետո եւս սոցիալ-տնտեսական վիճակը շարունակում էր ծանր մնալ, սակայն մենք մեզ անհոգ ենք զգացել ու երջանիկ, որովհետեւ հնարավորություն ենք ունեցել դպրոց հաճախելու, խաղալու ու շփվելու մեր հասակակիցների հետ:

Հետո եկավ 2020-ը, երբ խանութները լցված են տարատեսակ խաղալիքներով, տարատեսակ էլեկտրոնային սարքավորումներով, կան զվարճանքի վայրեր, հարմարավետ դպրոցներ: Սակայն 2020թ. սկսված կորուստների համավարակը, հետո 44-օրյա պատերազմը, այնուհետեւ Արցախի շրջափակումը զրկել են Արցախի 30 000 երեխաներին կրթություն ստանալու իրավունքից, զրկել են իրենց ուրախ խաղերից, կանգնեցրել սովի ենթացիվելու վտանգի առջեւ:

Արբեջանի կողմից վարվող ցեղասպանական քաղաքականությանը, ցավոք սրտի, գոհ են գնում նաեւ մեր երեխաները:

Արբեջանի կողմից գազի անջատման, հոսանքի չբավարարման, սնունդ չլինելու պատճառով Արցախի 30 000 երեխաներ զրկվել են կրթություն ստանալու հնարավորությունից, իսկ ստեղծված բարոյահոգեբանական վիճակը շատ բացասաբար է անդրադառնում նրանց վրա:

Խոսելով շրջափակման մասին, Մարթա Չիլինգարյանը՝ Մարտակերտի շրջանի Կանք գյուղից, ով այդ հազարավոր երեխաներից մեկն է, նշում է.

«Արցախի շրջափակումը կարծես թե կանգնեցրել է մեր կյանքի ընթացքը: Փողոցներում այնքան քիչ ենք հանդիպում մեքենաների: Դպրոց շտապող երեխաներ էլ չկան, որովհետեւ անորոշ ժամանակով դադարեցվել է դասագործընթացը: Այլեւս խանութներում չենք կարողանում գտնել մեզ անհրաժեշտ պարագաները, նույնիսկ դեղորայքի պակաս կա: Փակ միջանցքի երկու կողմում շարունակում են կիսված ընտանիքներ մնալ: Շարունակվող շրջափակմանն ուղեկցում են գազի եւ հոսանքի անջատումները: Բնակարանները զրկվում են ջեռուցումից, հոսանքն էլ եղած դեպքում խնայողաբար ենք օգտագործում: Շարունակվող շրջափակման մեջ հասկացել է, որ մարդիկ շատ բարի են, օգնում են միմյանց դժվարին պահերին, եւ հենց այդ ամենի միջոցով էլ մենք կկարողանանք հաղթահարել ներկայիս ճգնաժամային իրավիճակը»:

Շրջափակումից հետո Մարթան ավելի զգոն է դարձել, ավելի կարեկից ու սկսել է ավելի շատ արժեւորել կյանքի ամեն մի վայրկյանը: Նա հասկացել է, որ բոլորի կողմից սիրված Ամանորը ճիշտ սեղաններով ու հրավառությամբ անցկացնելուց բացի, նախ եւ առաջ՝ ընտանեկան տոն է, երջանկություն, եւ բոլորս պետք է սկսենք արժեւորել մեր ընտանիքի հետ ապրած յուրաքանչյուր վայրկյան, որովհետեւ փակված ճանապարհի այն կողմում հարյուրավոր երեխաներ ու ծնողներ կան բաժանված միմյանցից:

Մարթան դպրոցից ամենաշատը կարոտում է աշխարհագրության դասերն ու ընկերներին:

«Դպրոցը մեզ տալիս է կրթություն, որն էլ կարելու է հատկապես մեր ապագայի համար: Իսկ ներկայիս իրավիճակում մենք, համոզվում ենք, որ ավելի ու ավելի շատ պետք է զինվեք գիտելիքներով, որպեսզի կարողանանք պայքարել մեր իրավունքների համար, որոնք անտեսվում են աշխարհի հազարավոր գիտնականների կողմից»,- ասում է Մարթան:

Չնայած շրջափակմանը եւ դպրոց չլինելուն, Մարթան չի սիրում նստել տանը եւ տխրել, որովհետեւ այն համոզմունքն ունի, որ յուրաքանչյուր մութ սենյակում կարելի է լույս գտնել: Պարզապես ցանկություն է պետք:

«Օրվա մեծ մասը տրամադրում եմ ընթերցանությանը, նաեւ ստեղծագործում եմ, գրում բանաստեղծություններ, կամ էլ շարագրում այն, ինչ զգում եմ այդ պահին: Սկսել եմ նաեւ ուսումնասիրել տարբեր լեզուներ եւ ավելի խորացնել գիտելիքներս»,- ասում է Մարթան:

Նա բազմաթիվ նպատակներ ունի, սակայն չի սիրում դրա մասին խոսել:

«Ես սիրում եմ դրանց հասնելուց հետո խոսել այդ մասին: Ինչ նպատակ էլ որ ունեմ, միանշա-

նակ կապված է Արցախի անկախացման, ճանաչման եւ զարգացման հետ: Այն գիտելիքների պաշարը, որը ես ունեմ եւ պետք է դեռ ավելացնեմ, փոխանցելու եմ Արցախի ապագա սերունդներին, որովհետեւ կյանքը շարունակվում է, եւ սերունդների այս հերթափոխում մենք պետք է արժանի հետևորդ եւ նախնի լինենք»,- նշել է Մարթա Չիլինգարյանը:

Քաղաք Մարտունու Մեսրոպ Մաշտոցի անվան 9-րդ դասարանի աշակերտուհի Մերի Աղամյանը նշում է, որ մեզ պատուհասած եւ արդեն մեկ ամսից ավել շարունակվող աղետը մի օր պիտի ավարտվի, որովհետեւ արցախցին պայքարող է, նրա կամքին հնարավոր չէ բռնանալ, եւ արդար է, որովհետեւ այս հողը հայկական է եւ այստեղ ապրելու իրավունքը հայերին է պատկանում:

«Ես վստահ եմ, որ եթե այս ամենը շարունակվի թեկուզ տարիներ էլ՝ մենք կդիմանանք, կհաղթահարենք, քանզի մենք հայ ենք եւ Աստծո ընտրյալ ազգն ենք, իսկ Աստծո կամակատարների հաղթել չի լինի, քանի որ մեզանում հավատ կա, իսկ մեր հոգին պայքարող ու ազատ է: Մենք պատրաստ ենք ցանկացած զրկանքներ ապրելու, միայն թե պաշտպանենք ու հայկական պահենք այն հողը, որի համար հազարավոր երիտասարդներ իրենց կյանքն են տվել»,- ասում է Մերին:

Մերին շատ երազանքներ ուներ մինչեւ շրջափակումը, դրանք այսօր էլ ունի իր մտքում մտապահած, սակայն չի բարձրաձայնում, որովհետեւ այսօր անհատական երազանքների մասին ոչ ոք չի խոսում, բոլորը մեկ հավաքական նպատակ ունեն՝ հաղթահարել այս դժվարություններն ու սեփական հողում ապրել ազատ ու երջանիկ:

«Իմ բազմաթիվ երազանքների կողքին՝ իմ ամենամեծ երազանքը Արցախում՝ իմ հողում ապրելն է»,- նշում է նա:

Նա կարոտում է իր հարազատ դպրոցը, դասընկերներին, ուսուցիչներին, եւ շատ անհամբեր է, թե երբ պիտի սկսեն սորից դպրոց գնալ, գիտելիք ստանալ, իսկ մինչ այդ փորձում է իր օրերը հետաքրքրությամբ լցնել. ինքնակրթությամբ է զբաղվում, գրքեր է կարդում, ֆիլմեր դիտում: Նա համոզված է, որ դպրոցում ստացած գիտելիքներն են օգնում այս դժվարին իրավիճակում, եւ պետք է ամեն պարագայում շարունակել կրթվել ու զարգանալ:

17-ամյա Արսեն Գեւորգյանն Արցախի ապագա զինվորն է, նրա պաշտպանը: Նա համոզված է, որ Արբեջանի կողմից Արցախի շրջափակումը նպատակ ունի Արցախը հայաթափելու, սակայն կարծես թե լավ չեն ճանաչում արցախցիներին:

«Նրանք չեն հասկանում, որ շրջափակված Արցախում ոչ ոք միտք չունի լքել իր հայրենի հողը: Հակառակը, այս դժվարությունները մեզ միասնական են դարձնում, ուժ տալիս եւ էլ ավելի մեծացնում թշնամու հանդեպ ունեցած վրեժի մեր զգացումը»,- նշում է Արսեն Գեւորգյանը:

Արսենն այն հարյուրավորներից մեկն է, ով ոչ միայն զրկվել է կրթություն ստանալու իրավունքից, այլեւ արդեն 44 օր է, ինչ բաժանված է իր մայրիկից, ով գտնվում է երեւանում:

«Շրջափակումից հետո կյանքս 180 աստիճանով փոխվել է: Մայրս մնացել է Երեւանում եւ չի կարողանում վերադառնալ: Տան հիմնական գործերը ես եմ անում: Ամբողջությամբ փոխվել է աշխարհայացքս: Այս դժվարին պահերին մենք հասկացանք, որ միջազգային հանրությունը չի օգնում մեզ, որովհետեւ տարբեր երկրներ մեզնից որեւէ շահ չունեն»,- ասում է Արսենը:

Արսենը նույնպես կարոտում է իր դպրոցը, ուսուցիչներին, ընկերներին, որոնց հետ հնարավորություն ուներ դպրոցում շփվելու: Նա նաեւ լավ նկարում է, եւ նպատակ ունի մինչեւ բանակ գնալ իր անհատական ցուցահանդեսը կազմակերպել, որի հիմնական թեման Արցախը կլինի, իսկ գորացրվելուց հետո էլ նպատակ ունի դիզայներ դառնալ եւ իր փոքրիկ ներդրումն ունենալ Արցախը շենացնելու եւ ճանաչելի դարձնելու գործում:

«Այս օրերին, արդեն նշեցի, որ հիմնականում տնային աշխատանքներով եմ զբաղված, իսկ եթե ազատ ժամանակ եմ գտնում՝ նկարում եմ: Եթե հասցնեմ, մեր իրավիճակի հետ կապված նկար եմ նկարելու»,- նշում է Արսենը:

Վահագն ԿԱՉՍՏՐՅԱՆ

Արցախի շրջափակումը պարտադրում է ավելի ռացիոնալ օգտագործել առկա ռեսուրսները

Խոսում են արցախցի ուսանողները

Արցախի պետական համալսարանի ուսանողները Արցախի պետական համալսարանի դոցենտ, տ.գ.թ. Սուրեն Պարսյանի հանձնարարությամբ «Արցախի շրջափակման ընթացքում ի հայտ եկած տնտեսական խնդիրները և դրանց լուծման ուղիները» թեմայով հոդվածների շարք են պատրաստել: Ստորև ներկայացնում ենք Արցախի պետական համալսարանի տնտեսագիտության ֆակուլտետի «Կառավարում» բաժնի մագիստրատուրայի 2-րդ կուրսի ուսանողներ Անի Ազատյանի և Վահագն Խաչատրյանի հոդվածները:

2022թ. դեկտեմբերի 12-ին ադրբեջանցիների կողմից փակվել է Արցախի Հանրապետության հայկական վերահսկողության ներքո գտնվող տարածքը Հայաստանին կապող միակ ճանապարհը՝ Շուշի-Քարին տակ խաչմերուկի հատվածում, որը գտնվում է Ռուսաստանի Դաշնության զինված ուժերի խաղաղապահ առաքելություն ստանձնած զորքերի պատասխանատվության գոտում:

Շրջափակման հետևանքով Արցախում ստեղծվել է հումանիտար ճգնաժամ, դադարեցվել է պարենի, վառելիքի և դեղորայքի կանոնավոր մատակարարումները, առաջացել է մի շարք առաջին անհրաժեշտության ապրանքների պակասուրդ, այդ թվում՝ մանկական սննդամթերքի և որոշ ջերմիչեցնող դեղերի:

Արցախը Հայաստանին կապող միակ ճանապարհի արգելափակման հետևանքով փաստացի շրջափակված են Շուշիի շրջանի Մեծ Շեն, Հին Շեն, Եղծահող և Լիսազոր համայնքները: Անհնարին է դարձել դեպի այդ համայնքներ սննդամթերքի, մասնավորապես հացի և ալյուրի, ինչպես նաև առաջին անհրաժեշտության այլ ապրանքների մատակարարումը:

Արցախի առողջապահության նախարարությունը հայտնել է, որ Ադրբեջանի կողմից Արցախը Հայաստանի հետ կապող ճանապարհի արգելափակման հետևանքով առողջական ծանր խնդիրներ ունեցող Արցախի քաղաքացիների տեղափոխումը Երևան՝ սկզբնական շրջանում անհնար էր, այնուհետև իրականացվել է Կարմիր խաչի միջնորդությամբ: Դեկտեմբերի 14-ից Արցախի բուժօգնություններում ժամանակավորապես դադարեցվել են պլանային վիրահատությունները, ինչի հետևանքով շուրջ 430 քաղաքացի գրկվել է վիրահատվելու հնարավորությունից (16.01.2023 թ. դրությամբ):

Ադրբեջանի կողմից Արցախը Հայաստանին կապող ճանապարհի և գազամատակարարման պարբերական արգելափակման հետևանքով Արցախի Հանրապետությունում առաջացել է բենզինի, դիզելային, հեղուկ և սեղմված գազի պակաս: Էլեկտրաէներգիա-



յի մատակարարման հարցում ծագած դժվարությունները սպառնում են առավել խորացնել վառելիքի պակասից ծագած ճգնաժամը: Արդեն մեկ ամսից ավել է՝ շրջափակված Արցախում բենզալցակայաններն աշխատում են հատուկ կարգով, որը մշակել է օպերատիվ շտաբը: Վառելիքի գներում փոփոխություններ չեն գրանցվել, սակայն փոխվել է գնման ընթացակարգը: պարտադիր պայման է համապատասխան կտրոնի առկայությունը:

Արցախը Հայաստանին կապող մայրուղու փակվելուց անմիջապես հետո մայրաքաղաք Ստեփանակերտում հասարակական տրանսպորտը սկսել է գործել

արտակարգ ռեժիմով. սպասարկող ավտոբուսների թիվը կրճատվել է 50 տոկոսով: Պատճառը վառելիքի պակասն է:

Տաքսի ծառայություններ մատուցող ընկերությունները շրջափակման պատճառով ստիպված են ուղեւորափոխադրումներն իրականացնել միայն Արցախի տարածքում, սակայն վառելիքի պակասը նրանց համար նույնպես օրհասական խնդիր է:

Հունվարի 9-ից ադրբեջանական վերահսկողության տակ գտնվող տարածքից անջատվել է Հայաստանից դեպի Արցախ էներգասնուցումը: Ադրբեջանական կողմը հնարավորություն չի տալիս մասնագետներին՝ մոտենալ և հասկանալ պատճառները, անհրաժեշտության դեպքում՝ վթարավերականգնողական աշխատանքներ իրականացնել: Արցախի 120 հազար բնակչությունը փաստացի գրկված է անխափան էներգամատակարարման հնարավորությունից: Հանրապետությունում ներկայումս էլեկտրաէներգիայի պահանջարկը բավարարվում է միայն ներքին՝ խիստ սահմանափակ ռեսուրսների հաշվին: Հունվարի 10-ից հանրապետությունում իրականացվում են հովիարային անջատումներ:

Խիստ սահմանափակ ռեսուրսների պայմաններում, բնակչության նվազագույն էներգետիկ կարիքները հնարավորինս երկարաժամկետ կտրվածքով ապահովելու նպատակով, Արցախի կառավարությունը հակաճգնաժամային քայլեր է ձեռնարկում՝ էլեկտրաէներգիայի արտադրման եղած պաշարները խնայելու ուղղությամբ:

Ստեղծված տնտեսական բարդ իրավիճակի պատճառով նախնականորեն առկա 4100 մարդ կորցրել է աշխատանքը և կամատի աղքատությունը: (20.01.2023 թ. դրությամբ):

Բերձորի միջանցքի փակման հետևանքով Արցախում բազմաթիվ ընկերություններ փակվել են: Տեղական հումքով աշխատող որոշ կազմակերպություններ դեռ աշխատում են, բայց ներկրվող օժանդակ նյութերի պակասն արդեն զգացվում է: Որոշ ընկերությունների արտադրանքի սպառման հիմնական շուկան Հայաստանի Հանրապետությունն ու Ռուսաստանի Դաշնությունն են, և ստեղծված իրավիճակում տնտեսավարող սուբյեկտները ֆինանսական խնդիրներ ունեն: Նրանք մտածում են արտադրանքը տեղական շուկայում իրացնելու ուղղությամբ, սակայն ներկայիս պայմաններում բնակչությունը հակված է հիմնականում առաջին անհրաժեշտության ապրանքների ձեռքբերմանը:

Առավել ծանր իրավիճակում են հայտնվել ապրանք ներկրող ընկերությունները:

Արցախի շրջափակումը ծանր հարված է հասցրել հանրապետության տնտեսավարող սուբյեկտներին: 726 տնտեսավարող սուբյեկտ (ընդհանուրի 17,7%-ը) շրջափակման պայմաններում աշխատելու անհնարինության պատճառով կասեցրել են իրենց գործունեությունը (16.01.2023 թ. դրությամբ):

Միակ միջանցքի փակումը Արցախում պարենային խնդիրներ է առաջացրել: Շրջափակմանը հաջորդած 1-2 շաբաթվա ընթացքում փակվեցին միրգ-բանջարեղենի խանութները. ապրանք չեն ստանում: Սկզբում վերջացան լայն սպառման ապրանքները, այնուհետև՝ գրեթե ամեն ինչ: Խանութների դարակները գրեթե դատարկ են:

Դեղատներում շատանում են հերթերը, բացակայում են ամենապահանջված դեղամիջոցները: Դեղատներում կա ջերմիչեցնող դեղերի, ցավազրկողների, հակաբիոտիկների, մանկական կերերի և տակդիրների պակասություն:

Ավելի քան 14400 տոննա կենսական նշանակության ապրանքներ կմակատարարվեն Արցախ, եթե չլիներ շրջափակումը, որի ընթացքում Կարմիր խաչի միջազգային կոմիտեի և ՌԴ խաղաղապահ զորակազմի կողմից մատակարարվել է դրա միայն չնչին մասը:

Առկա պարենային ապրանքները առավելագույնս համաչափ բաշխելու համար Արցախում ներդրվել է կտրոնային համակարգ: Արցախցիները տրամադրված կտրոններով 2023 թվականի հունվարի 20-ից կարող են գնել մեկ լիտր ձեթ ու մեկական կիլոգրամ բրինձ, մակարոն, հնդկածավար ու շաքարավազ:

Կտրոնային համակարգի անհրաժեշտության մասին արցախցիները խոսում էին շրջափակման առաջին իսկ տասնօրյակում, երբ խանութների դարակները դատարկվեցին, իսկ կառավարության պահուստներից

տրամադրվող մթերքը շատ արագ անհետանում էր վաճառասեղաններից, մթերք հասնում էր նրան, ով ծանոթ խանութպան ուներ կամ էլ ճարպկորեն հետետում էր, թե որ խանութը որ պահին ինչ ստացավ:

Այսօր հերթերը դատարկ խանութներից տեղափոխվել են բանկոմատների ու տերմինալների մոտ, մարդիկ ոչ միայն աշխատավարձը, կենսաթոշակն էլ միանգամից հանել չեն կարող, քանի որ կանխիկի դրամաշրջանառության հետ կապված խնդիրներ են առաջացել: Բնակչության կողմից մեծ ծավալի գումարի կանխիկացումը նվազեցրել էր կանխիկի դրամաշրջանառությունը: Խնդրի կարգավորման ուղղությամբ օպերատիվ շտաբը միջոցներ է ձեռնարկել, և մտցվել



են որոշակի փոփոխություններ: Մասնավորապես, Արցախի Հանրապետությունում առկա բոլոր բանկոմատներից և POS տերմինալներից միեւնույն վճարային քարտով կանխիկացումների համար գործում է սահմանափակ՝ օրական մինչև 50 հազար դրամի չափով: Արցախում գործող բանկոմատների ու POS տերմինալների միջոցով կանխիկացման հնարավորությունն ապահովված է ցանկացած բանկի քարտերի համար: Կանխիկի խնդիրը լուծելու համար անհրաժեշտ է Արցախում գարգացնել անկանխիկ վճարման համակարգեր, որը հնարավոր է ապահովել նոր սերնդի ՀԴՄ-ների ներդրման միջոցով:

Շրջափակումը փոխում է տնտեսությունն ու պետության առաջնահերթությունները: Պետությունն արդեն ստիպված է արձագանքել շրջափակման հետևանքով տնտեսական և սոցիալական ոլորտներում առաջացող խնդիրներին՝ վերանայելով իր աշխատանքը, մոտեցումները, ուղղությունները: Միաժամանակ, շրջափակումն ու դրա հետևանքով ստեղծված ճգնաժամը պարտադրում են ավելի ռացիոնալ օգտագործել առկա ռեսուրսները, բացահայտել բոլոր խնդիրները, այդ թվում՝ սովորաբար տնտեսության հետ կապված, ներդրել կառավարման ավելի արդյունավետ մոդելներ: Արցախում ստեղծվել է աշխատանքային խումբ՝ շրջափակման տնտեսական և սոցիալական հետևանքների մեղմմանն ուղղած միջոցառումներ մշակելու նպատակով:

Շրջափակման մեկնարկից ի վեր՝ աշխարհի բազմաթիվ երկրներ ու միջազգային կազմակերպություններ դատապարտել են Ադրբեջանի գործողությունները և կոչ արել վերացնել շրջափակումը: Հարցը քննարկվել է նաև ՄԱԿ-ի անվտանգության խորհրդում: Մարդու իրավունքների եվրոպական դատարանը պարտավորեցրել է Ադրբեջանին՝ ձեռնարկել բոլոր անհրաժեշտ և բավարար միջոցները՝ վերացնելու շրջափակումը: Հարցը շուտով կքննարկվի նաև ՄԱԿ-ի Արդարադատության միջազգային դատարանում (Հաագա)՝ Ռասայական խտրականության վերացման կոմիտեի վարույթի շրջանակներում:

Արցախում և Հայաստանում քաղաքացիների կողմից տեղի են ունեցել բազմաթիվ բողոքի ակցիաներ պետությունների դեսպանատների, ՄԱԿ-ի գրասենյակի, Կարմիր խաչի միջազգային կոմիտեի առջև, սակայն ոչ մի արդյունք չեն տվել:

Չնայած այդ ամենին, ադրբեջանական կողմը գործում է անպատժելիության մթնոլորտում: Միջազգային հանրությունը պետք է գործի շատ հստակ ձեռով. օրինակ՝ պատժամիջոցներ սահմանելով Ադրբեջանի դեմ և պարտադրելով Ադրբեջանին հետելու միջազգային իրավունքով ստանձնած պարտավորություններին:

Հեղինակ՝ Անի ԱԶԱՏՅԱՆ

Արցախի կառավարությունը պետք է ամբողջությամբ վերանայի սոցիալ-տնտեսական քաղաքականությունը

2022 թվականի դեկտեմբերի 12-ից շարունակվող Արցախի շրջափակման հետևանքով ի հայտ են եկել լրջագույն տնտեսական մի շարք խնդիրներ. դրանք են՝

- Արցախի պետությունից 20 տոկոս մուտքն ապահովող հանքարդյունաբերության ոլորտի աշխատանքի դադարեցումը,
- Շինարարության դադարեցումը,
- Ապրանքաշրջանառության դադարեցումը,
- Գյուղատնտեսության ոլորտում աշխատանքների խաթարումը,
- Տնտեսավարող սուբյեկտների, մասնավորապես ՓՄՁ սուբյեկտների փակումը,
- Չբուսաշրջության արգելափակումը,
- Ֆինանսական ոլորտում դրամաշրջանառության և փողի քանակի նվազեցումը,
- Գործազրկության աճը,
- Ինֆլյացիան,
- Էներգետիկ համակարգի ճգնաժամը,
- Պարենային անվտանգությունը և այլն:

Հանքարդյունաբերության ոլորտում Կաշենի հանքավայրի շահագործման դադարեցումը հանգեցրել է 1 800 աշխատակիցների գործազրկության:

ՀՀ-ից ապրանքների ներմուծման դադարեցումը պայմանավորված՝ 100-ավոր փոքր խանութներ և հատկապես գյուղատնտեսական արտադրանք վաճառող խանութներ փակվել են, ինչը գրկել է դրանց սեփականատերերին եկամտի աղբյուրից:

Արցախի ժամանող հյուրերի բացակայության պայմաններում լրջագույն վնաս է կրում զբոսաշրջության ոլորտը, մասնավորապես՝ հյուրանոցային բիզնեսը:

Մեղի բացակայության պայմաններում լրջագույն վնասներ է կրում նաև ռեստորանային բիզնեսը:

Շինարարության ոլորտում աշխատանքների դադարեցման պարագայում գործազուրկ են դարձել 1000-ավոր քաղաքացիներ:

Սպառողների խուճապային վարքագծով պայմանավորված՝ խանութները դատարկվել են, ի հայտ է եկել ապրանքների պահանջարկի աճ, որն էլ հանգեցրել է ինֆլյացիայի, իսկ ֆինանսական ոլորտում կրճատվել է փողի քանակը՝ պայմանավորված այն հանգամանքով, որ քաղաքացիներն իրենց ավանդները կանխիկացնում էին:

Գազամատակարարման դադարեցման արդյունքում էներգետիկ համակարգն էլ վիճակի չէ երկար դիմակայելու. ի հայտ են գալիս ջեռուցման, թոնրատների աշխատանքների խաթարումներ:

Անհեռատես տնտեսական քաղաքականության արդյունքում Արցախում այսօր կա ազգային անվտանգության խնդիրներն ավելի չխորացնելու համար:

Այս խնդիրների լուծմանը հասնելու ուղղությամբ ԱՀ օպերատիվ շտաբը արդեն իսկ իրականացնում է մի շարք քայլեր կարճաժամկետ լուծումների հասնելու համար, մասնավորապես՝ կտրոնային համակարգին անցումը, կանխիկացման սահմանափակումները, հովհարային անջատումները և այլն:

Կտրոնային համակարգին անցումը կատարվում է մի քանի տեսակի ապրանքների համար, սակայն պետք է սահմանվեր առաջին անհրաժեշտության կենցաղային ապրանքների ցանկ ևս և դրա բաշխումը նույնպես կազմակերպվեր կտրոնային համակարգով: Պետությունը հնարավորինս մեծ թվով խանութների պետք է ապահովի ապրանքներով: Ներկայումս ան-

հասկանալի է, թե ի՞նչ սկզբունքով են ընտրվում այդ խանութները: Երկարաժամկետ հատվածում, մեր կարծիքով, անհրաժեշտ է ռուս խաղաղապահների կամ Կարմիր խաչի միջոցով անհրաժեշտ գյուղաբերքների սերմեր ներմուծել Արցախ և այն հատկացնել գյուղացիներին, որպեսզի իրենց սեփական այգիներում իրենց անհրաժեշտ գյուղաբերքը կարողանան աճեցնել և ինքնաբավության հասնել, կազմակերպել դասընթացներ դրանց ճիշտ մշակման համար: Սա թույլ կտա նաև ինքնազբաղվածություն ապահովել:

Խոշոր գյուղատնտեսներին և հատկապես պետական սուբսիդավորմամբ կամ անհատույց ջերմոցային խոշոր տնտեսություններին անեցող անձանց վրա սահմանել վերահսկողություն և պետական վերջին շրջանակում կազմակերպել գյուղաբերքի ճիշտ մշակում և աճեցում: Խոշոր ջերմոցային համակարգերը, որոնք բավականին ներդրվել են Արցախում, կարող են տարվա ընթացքում մի քանի անգամ բերք ապահովել:

Պետք է կատարել դիզվառնիքի ճիշտ բաշխում, հնարավորության դեպքում՝ ներմուծում ռուս խաղաղապահների օգնությամբ՝ գարնանացանի աշխատանքները կազմակերպելու և ամռան շրջանում հատիկեղենի բերքահավաք կազմակերպելու համար: Միաժամանակ, հնարավոր կորուստներից խուսափելու համար պետք է վերանորոգել հակակարկտային կայանները, ապահովել ոռոգումը:

Անասնապահության ոլորտում ձմռան ամիսներին անհրաժեշտ է հնարավորինս անասնակերը ճիշտ բաշխել, այդպիսով խուսափելու նաև կովերի գլխաքանակի կրճատումից, որը կհանգեցնի կաթնամթերքի շուկայում դեֆիցիտի, իսկ գարնան ընթացքում արդեն կբարձրանա նաև կաթնատվությունը և կաթնամթերքային ապրանքներով կապահովվի շուկան:

Պետության կողմից պետք է կատարվի վերահսկողություն՝ շուկայում սպեկուլյատիվ ինֆլյացիան բացառելու համար: Պետք է կատարվի կոմունալ ծառայությունների սուբսիդավորում՝ պայմանավորված գործազրկության բարձրացմամբ և ընտանիքներում եկամուտների կրճատմամբ:

Ապաշրջափակումից հետո Արցախում առաջնային պետք է լինի այլընտանքային էներգիայի օգտագործման ապահովումը: Համագային ներուժը պետք է օգտագործել արեւային էներգիայով տնային տնտեսություններին ապահովելու համար:

Դրամաշրջանառության առումով՝ կարծես թե հնարավոր է եղել ապահովել ԱՀ դրամի մուտքը ՀՀ-ից, սակայն պետք է շարունակել կանխիկացման սահմանափակումների կիրառումը:

Հեղինակ՝ Վահագն ԽԱՉԱՏՐՅԱՆ



Ուսանողներն ուզում են այս իրավիճակը հաղթահարել ուսման միջոցով

Ի՞նչ խնդիրներ է հարուցել շրջափակումը բուհական կրթության համակարգում: Այս հարցի վերաբերյալ «Ապառաժ»-ը գրուցել է Մեսրոպ Մաշտոց համալսարանի պրոռեկտոր Ալիսա Բաղդասարյանի հետ:

«Բնականաբար, շրջափակումն ու դրա հետևանքով առաջացած խնդիրները դժվարություններ են ստեղծել ինչպես մյուս ոլորտների աշխատակիցների, այնպես էլ ուսումնական հաստատությունների համար: Նախ, շեշտ են այն հանգամանքը, որ մեր ուսանողներից, նույնիսկ աշխատողներից մի քանիսը դեռևս գտնվում են ՀՀ-ում և չեն կարողանում վերադառնալ: Ուստի, իրավիճակից ելնելով, այնպես ենք կազմակերպել ուսումնական գործընթացը, որ հնարավորինս ձերբազատվենք առաջացող խնդիրներից: Այս պահին առաջին կիսամյակի քննաշրջանի և հետևյալ բաժնի ուսումնական գործընթացի ամփոփմամբ են երկրորդ կիսամյակի ուսումնական գործընթացը սկսելու նա-

խապատրաստությամբ ենք զբաղված: Փետրվարի 7-ից առկա ուսումնական գործընթացը պիտի վերսկսվի, չգիտենք ինչ է լինելու, ինչպես է կազմակերպվելու, դեռևս իրավիճակը պարզ չէ, այն ժամանակ պարզ կլինի ևս տվյալ իրողությամբ էլ կառաջնորդվենք»,- իրավիճակն է ներկայացնում մեր գրուցակիցը:

Խոսելով ուսանողների տրամադրվածության մասին՝ նա նշում է, որ ուսանողները պատրաստակամ են՝ ներկայանալ, սովորել, նրանք ուզում են այս իրավիճակը հաղթահարել ուսման միջոցով: «Բնական է՝ հոգեբանական և տնտեսական ծանր իրավիճակում ենք հայտնվել, խնդիրներն առկա են, սակայն ցանկացած խնդիր հաղթահարելի է: Մեր ժողովուրդն ուժեղ է, այս ամենին



կոփմանա, որովհետև ապրում են պայքարում և հողի համար: Մեր ուսանողներն ընկճված չեն, հիասթափված չեն, սա է կարևորը, իսկ դասախոսներն ամեն ինչ անում են, որպեսզի ուսանողներն իրենց լավ զգան»,- նշում է դասախոսը:

Անդրադառնալով վերջին մի քանի տարվա ընթացքում արտակարգ իրավիճակներում ուսում ստանալու մասին հարցին, Ալիսա Բաղդասարյանը նշում է, որ խնդիրն առավել ընդգծված է դպրոցներում: «Քանի որ ուսանողները հասուն մարդիկ են, խորհրդատվությունների, ինքնուրույն աշխատանքների միջոցով հնարավոր է նյութը տեղ հասցնել, իսկ աշակերտը ուղղորդվելու կարիք ունի: Դրա համար պետք է ուսուցիչները և ծնողներն աշակերտներին ուղղորդեն: Հիմա պետք է ուսուցիչ-ծնող փոխհամագործակցությունն ամուր և արդյունավետ լինի, որ երեխաները սովորեն, կրթություն ստանան: Դասախոս-ուսանող կապը մեզ մոտ շատ ընդգծված է. թե օկլայն միացումներով, թե առդեմ հանդիպումներով այն ավելի է ամրապնդվում: Իհարկե, ինչ-որ բան պետք է արվի, որ այս իրավիճակն այսպես երկար չշարունակվի: Հատկապես խնդրահարույց վիճակ է դպրոցների համար»,- կարծում է նա:

Տաթևիկ ԱՐԱՋԱՆՅԱՆ